

唔怕話你知，我老婆係貞子

作者: 小景

Powered by [紙言](#)

第一章：愛情降臨

果晚有一個朋友聚會，地點選擇左係某朋友屋企。

都係啲普通聚會，幾個朋友圍埋劈下酒食下零食吹兩嘴睇下電影咁。

由於幾個朋友都係恐怖片發燒友，所以每次聚會都會揀恐怖類既電影係電視播。

而果晚佢地選擇左一套經典恐怖日本電影【貞子】。

其實果晚咁岩撞正我失戀，所以我順便上去買醉，唔洗好快已經飲醉左。

當套電影播到一半既時候，我已經醉到頂唔順，所以決定同佢地講聲要走先。

阿文：【阿景~咁快走啦？仲好早渣啲，睇多陣先啦。】

我：【唔啦~有啲醉啦，我返屋企休息先】

阿文：【咁唔比面貞子？因住佢今晚搵你阿~】

我：【黎咪黎~未驚過！】

然後我就轉身行出左朋友屋企，回家去。

返到樓下間CD鋪，我決定問老闆租隻【貞子】睇埋佢。

我：【老闆~有無果套叫做【貞子】既電影租呀？】

老闆：【都唔知話你好彩定唔好彩，原本有一隻既，不過咁岩租左出去，我呢度有餅錄影帶以前人地錄低送比我既~我自己都無睇過，你岩睇既話就索性送你啦。】

我：【哇~咁多謝曬啦！】

老闆：【客咩氣~大家街坊街里幫到就幫，況且我都就黎執笠，多謝你一路以黎既支持就真。】

聽完我都眼濕濕，眼見既CD鋪真係買少見少。

返到屋企後，我第一時間搵返部封塵已久既舊式電視機出黎，將餅錄影帶放入去播。

奇怪既係播左一陣都係無畫面出，正當我行過去伸手熄部舊式電視機，以為佢已經壞左既時候。

突然電視機有返畫面，畫面影住一個井，我等左佢幾十秒都無換過其他畫面，以為餅帶有事所以決定熄左佢唔睇。

正當我轉身行左幾步，忽然聽到後面發出【呃...呃...呃】既聲音，我寧轉身睇下發生咩事。

大叫左一聲：【唔那係掛！！】

眼望著電視機入面有隻貞子爬緊出黎，一邊心入面自言自語：【肯定係我飲大左！幻覺黎架啫！嚇我唔到既！】

我嚇到腳仔都軟埋連企既力都無，一路嚇到講唔到野一路縮，驚到連我都唔知已經到左牆角，心知自己死期到。

而貞子亦都已經爬到我既面前，我閉上雙眼完全唔敢望佢。

我低著頭好驚咁講左句：【你除左識嚇人之外仲識啲咩呀！拍拖你又識唔識呀！....嗚嗚....嗚】

講完之後我喊到收唔到聲，而貞子見到我呢個情況頓時呆左。

【嘿...嘿...嘿】貞子發出低聲既笑聲。

我撐開雙眼望見佢嘴角向上揚，似乎係度嘲笑緊我失戀既事實。

我：【笑咩阿~笑！你又未拍過拖點會明我感受！要殺就殺啦！反正我都唔想繼續活啦！】

貞子：【拍拖？係咩黎？影響力可以大到連命都唔要？】

我：【你試過就知！】

貞子：【咁請你同我拍拖，拜託了。】

我驚呆地說：【下?...】

我地既愛情故事就係咁而開始左。

第二章：勢不可擋

第二日，我醉醒之後。

當我以為琴日發生既事係一場夢既時候，手機隨即響起。

【鈴...鈴...鈴】

我完全將琴日既事拋諸腦後，如常咁拎起電話。

【喂？】我說。

【沙..沙..沙】電話裏傳出沙沙聲。

幾秒後傳出一把沉重既聲音說：【...係...我。】

【貞子？】我講笑咁講。

【...係...】貞子說。

我腦海裏隨即唸起琴日發生既事，驚到即刻收左佢線。

以防萬一，我即刻上網搜尋左關於對付貞子既各種方法。

說時遲，那時快。電視機自己開著左並傳出雪花既畫面，我知佢要黎料。

方法一：將電視機面向牆，等貞子爬唔到出黎。

我即刻狗衝過去將舊式電視機搬到牆角面向牆。

我大叫一聲：【弊！】

貞子好聰明咁選擇左係我新個部電視機度出黎。

我唯有即刻洗出方法二：將兩部電視機面對面拍埋一齊，等貞子係電視之間爬黎爬去，出唔到黎。

我拍一拍自己額頭，大叫一聲：【頂！】

貞子好聰明咁伸手將其中一部電視機推開先，再爬。

我果斷洗出方法三：係貞子爬到一半時，拔掉電視機插頭，等佢卡係電視機裏面。

當我拔左插頭後，然而發覺都係唔得！佢仲係爬緊出黎！

我即刻洗出方法四：係電視機螢幕前擺一面鏡子，等貞子爬出黎時見到自己個樣，嚇死自己。

貞子已經爬左出黎，佢照一照鏡對住我講：【多謝你送禮物比我】

我：【...客咩氣，如果無咩事既話你可以返去先啲。】

貞子：【頭先打電話比你，做咩收我線？】

我：【你...你知啦，依家啲電話費咁貴，我都唔好意思傾咁耐既...係咯..無咩事你可以返去先。】

貞子：【你唔好唸住避到我呀！話埋比你聽，你就算將電視機對住窗口我都係爬到出黎架~】

我：【無我點會避你呢你咁可愛咁迷人咁得人鐘意~係咪？】

貞子將塊面挨埋黎我度說：【真...係？】

我好驚咁說：【係..係..梗係~】語速好快。

貞子：【原本打黎同你講聲早晨既，見你收線驚你有事黎睇下你啫，無事啦依家。】貞子好快咁轉身入返電視機入面。

我頓時呆左，心知不妙，原來琴日發生既事係真，呢下真係大檸樂。

真係講都唔信，我竟然會同隻女鬼扯上左關係。

第三章：墮入愛河

為左方便工作既關係，我自己一個人搬左出去住，間中會返去探下父母。

貞子轉身走左後，我望住四面牆，心底裏有種被挖空既感覺出左黎。

係果一刻先察覺其實一個人住都幾寂寞，有時想搵個人傾下計都無。

接著腦袋裏走左個想法出黎，不妨一試！！我要同貞子拍拖！！

就係咁，我踏出左我既第一步，我選擇主動去拉近我與貞子之間既距離。

我對住部電視機講：【貞子，係咪度呀，出黎一齊食個飯啊不如？】

我坐左係電視機前面，雙眼望實個螢幕，等待著佢出黎。

突然後面有一隻手點左一下我膊頭，我隨即成個人嚇到彈左起身。

我：【嘩！想嚇死人咩！】

原來貞子不知不覺係我後面出現左。

貞子：【傻瓜~只要我鎖定左某個人就可以隨時隨地現身，唔一定係電視機裏面出黎。】

我抖返順條氣說：【哦早講啊嘛但你咁樣真係會嚇死人架！】

【嘻嘻...嘻嘻...嘻嘻】貞子發出笑聲，佢係度嘲笑緊我驚恐既樣子。

我唔忿氣地說：【哈！約你食餐飯都要比你嚇餐飽既！真係呀！】

貞子繼續笑似乎無理會到我講既野，我亦都無佢咁好氣。

【過黎一齊食啦。】我坐係飯檯前說。

貞子用瞬移既能力，瞬間坐左係我對面張櫈度。

雖然今晚沒有美酒佳餚，只係一餐粗茶淡飯，但貞子一句說話都無埋怨到。

佢低著頭一言不發咁完成左整個食飯過程，我唸係佢本性平靜既關係所影響。

而我亦無追問我煮的菜式味道如何，但我十分之享受這個寧靜既夜晚。

心入面果個被挖空既洞亦被填上，我感覺到有一種說不出的愛。

我既淚腺頓時失控淚水係眼眶度不斷地徘徊，我即刻寧轉身唔想比佢見到。

貞子好似察覺到我想喊既事實，佢說：【放心~有我陪你。】

我既淚水如洪水般從眼眶流出，我衝埋去擁抱著貞子。

我喊到豬頭咁講：【多謝你呀~真係好多謝你呀。】好耐都無試過咁感動。

由果一刻開始，我就深深咁愛上左貞子。

第四章：愛無界限

當我以為同女鬼拍拖呢啲咁既情節係得電視劇同電影先會有，點知到頭來真係發生左係自己身上。當然我亦無將呢一件事話比父母或者身邊既人知，因為反正講都無人信，而且分分鐘仲會比人話係傻添。

因此我打算等到一個合適既時機先再話比佢地知。

傍晚七時，我收工回家。

【我返黎啦！】我踏入家門說。

全屋漆黑一片什麼也看不見，我心唸：咦？貞子呢？

我伸手去開燈，燈亮的一瞬間，一個身影出現係我面前，係貞子企左係度。

我嚇到向後跌低左，原來佢一直等緊我門。

我：【做咩唔開燈呀？嚇死人咩！個心離一離呀！】

貞子溫柔地說：【歡迎回家~】

由於貞子慣左長期係無光既環境下生存，所以我無怪佢。

我：【下次天黑你係度就要開返燈啦，知唔知？】

貞子點了一下頭表示明白。

我：【係咯~你有無話鐘意食咩餸咁呀？】食晚飯中

貞子繼續食野並沒有回應我。

由於佢頭髮好長既關係，啲頭髮掂到佢飯碗啲餸都唔知。

我見到呢個情況，即刻行埋貞子身邊幫佢撥開啲頭髮。

原來佢食到成嘴都係，我係檯上紙巾盒抽左張紙巾幫佢抹嘴。

我微笑地說：【睇下你~食到成嘴都係。】

係呢個時候，貞子望住我，而我亦望住佢。

呢次係我地第一次對望，我深深咁比佢對大眼睛吸引左。

唔知仲以為佢帶左大眼仔，水汪汪既雙眼簡直電暈左我。

日子一日一日咁過去，所謂情人眼裏出西施，我發覺佢簡直係我理想中既情人。

貞子擁有一頭烏黑亮麗既長髮，對於鐘意長髮女仔既我，簡直係迷人。

加埋果對水汪汪既大眼睛，真係望一望個心都融化埋。

貞子好乾淨整潔，件衫著極都係咁白。咁當然我間中都會帶佢出街買下其他款既白色衫既。

唔洗驚貞子變老，一直以黎咁多年都係果個樣，咩野女人四十爛茶渣完全唔需要驚。

貞子身材好，從佢係電視機度爬出黎，扭動著佢果條纖細既腰，果個動作就已經睇得出無幾十年舞蹈訓練基礎，絕對做唔到。

貞子好有情調，成日會打黎之後唔出聲，等你估係邊個，說明左佢無時無刻都係度掛住你。

貞子身世可憐，臉色蒼白加上一對憂鬱既眼神，令你有種好想照顧佢既衝動。

貞子性格沉默寡言，唔會成日講三講四，嘍嘍嘈嘈，相比起啲八婆簡直係人間中既極品。

貞子好養活，佢唔洗飾品，佢唔洗化妝品，甚至可以話連飲同食都唔洗....

貞子隨叫隨到，只要你想見佢，佢可以即刻出現係你面前。

貞子好守時，只要你睇左關於佢既影片，就會係指定既時間內將你殺死，從不會遲。

所以你話，我點可以唔愛上佢。

第五章：逢凶化吉

唔經唔覺已經同貞子交往左幾個月。

我望住佢由初初連燈都唔開，變到而家買餅、洗衫、煮飯、做家务樣樣掂。

連我心底裏都為佢而感到開心。

我記得有一次出街，我主動去拖佢隻手。

佢問我：【點解要拖手既？】

我講笑咁講：【話明拍拖拍拖啊嘛，唔拖又點算拍拖呢，係咪？】

貞子：【哦~原來係咁樣架。】

我望住佢信到我十足既樣，真係差啲笑到淚水都標埋出黎。

我：【講笑渣~無咩話點解既，因為愛咯你可以話。】

仲有一次我帶佢出街買衫，我問佢點解買衫一定要買白色。

貞子：【因為我想打扮到好似公主咁。】

我輕輕走向前撥開佢既頭髮吻左佢嘴唇一下。

我低聲溫柔地說：【傻瓜~你就係我既公主。】

貞子：【點解你會吻我？】

我：【因為愛，當你愛一個人就會想吻佢。】

貞子回吻了我一下，然後說：【我唸我已經大概知咩叫愛了，多謝你。】

我特別鐘意佢果份清純，真係好真。

【鈴...鈴...鈴】我的手機響起。

【仔呀~我而家係你屋企樓下呀，我上黎幫你執屋呀，咁耐無黎探我地，睇怕都好忙，屋企好亂架啦。】媽說。

我好心急咁講：【媽！千奇！千奇！唔好上去呀！你聽我講，今日唔洗幫我執屋住，你返去先啦。】

【一場黎到，點都要幫你打掃下既，還掂我又有鑰匙，得架啦仔，交比媽啦。】媽說。

我即刻同上司講有急事，狗衝趕返屋企，我驚貞子見到陌生人入屋會殺左佢。

【媽！你無事呀嘛？媽！】我衝入屋企門口，四周圍搵呀媽，呀媽並沒有回應我。

貞子：【咦？阿景你今日咁早返黎既？】

我望見貞子雙手沾滿紅色，我好緊張咁捉住佢問：【我呀媽呢？唔通...】

【仔~做咩一返黎就鬼殺咁嘈呀，掛住呀媽都唔洗咁架，一齊食飯啦就開得飯架啦。】阿媽係廁所度行出黎說。

【哎呀呀，無見幾個月，收埋個女朋友仔都唔同啊媽講，岩岩同阿貞傾開，佢一聽到我鐘意食番茄，即刻就話整比我食啦，真係好有我心，你唔好虧待人呀仔。】媽說。

我心唸：【哦，原來係切番茄呀，虛驚一場添。】

媽：【幾好呀，阿貞將屋企打理得企企理理，識煮餅又有我心，呢個年頭好少呢啲女仔架啦，你要好好珍惜呀仔。】

我：【得啦媽，我有分數，連你果關都過左既，我就放心啦，我原本仲唸緊幾時話比你聽好。】

食完飯後，媽亦返左屋企，臨離開我屋企前仲叫阿貞得閒去探佢地，睇黎佢真係好喜歡阿貞。

第六章：成家立室

話咁快我同貞子拍左拖已經一年，雙方亦視對方為終身伴侶，所以決定左結婚。

係婚禮上好多朋友先得知我有左對象一年，更讚我大膽娶既對象竟然係貞子。

可能對我黎講，一個唔殺人既貞子，唔單止一啲都唔可怕，仲有小小可愛添。

係婚禮當日，我並無覺得貞子著上婚紗而特別美麗，可能係我睇慣左佢平日著白色衫既原因。

但當日係我第一次見佢化妝既樣，原來化起妝上黎都幾靚，甚至可以話唔差過眾人成日擺出黎做例子既angelababy。

婚後既日子都過得幾美滿，好快我同貞子就有左愛情結晶品，係個女仔黎，改左名叫小貞。

貞子自從拍左《貞子vs伽椰子》呢套戲之後，因為由錄影帶方式轉變為互聯網方式傳播，所以佢而家既人氣非常之高，幾乎世界各地都無人唔識佢。

好多人搵佢拍戲、拍廣告、做時裝代理人等等，亦都因為佢咁忙，所以我決定左辭左份工專心係屋企照顧小貞。

誓死都估唔到自己老婆會變成明星既一日。

初頭都好驚對於全職爸爸呢個職位自己做唔黎，但隨著日子漸漸過去，由初頭做野搵手唔成勢到而家做到有板有眼。

睇住小貞一日一日咁長大，便覺得好有成功感，相比起過往係工作上既拼搏，係小貞身上尋獲成功感更為容易。

在擁有著天使面孔的小朋友面前，尋獲快樂亦都好簡單，只要望住佢地天真可愛既笑臉，你自然已經感到滿足。

係陪伴小貞玩遊戲既期間，我仿佛搵返失去多年既兒時樂趣，好多係大人眼中所謂既低能遊戲，我卻與小貞玩得津津樂道。

學習其他興趣亦成為我的消閒活動，其中我學識左剪髮。

仲記得我第一次幫小貞剪髮既時候，佢問我。

小貞：【爹地，點解媽咪頭髮咁長，都唔洗剪頭髮既？】

我：【哦~咁係因為媽咪工作關係要留住把長髮呀。】

小貞：【咁我大個左，我都要留！】

小貞因為成日好鐘意伸手去摸貞子把長髮，所以先咁講。

我微微一笑無回應佢，反而係度唸無左一把長髮既貞子仲算唔算係貞子呢？

貞子亦明白陪伴家人既重要性，所以即使幾受民眾歡迎都好亦會抽時間出黎，一齊享受家庭樂趣。

就係咁，我地一家三口過上幸福快樂既日子。